



Bosnia and Herzegovina
Federation of Bosnia and Herzegovina

CANTON SARAJEVO
Ministry for Education

Broj: 01-07/02-04-32093~~24~~24
Sarajevo, 23. 12.2024. godine

SKUPŠTINA KANTONA SARAJEVO
n/r Okerić Elvedina, predsjedavajućeg Skupštine Kantona Sarajevo

PREDMET: Odgovor, dostavlja se

Cijenjeni,

Zastupnica u Skupštini Kantona Sarajevo **Marijela Hašimbegović** u skladu sa članom 213. stav (1) Poslovnika Skupštine Kantona Sarajevo („Službene novine Kantona Sarajevo“ broj: 41/12, - Drugi novi prečišćeni tekst 15/13, 47/13, 47/15, 48/16, 9/20, 14/20, 16/22 i 17/22 - Ispravka), u okviru 16. radne sjednice Skupštine Kantona Sarajevo, uputila je zastupničku inicijativu:

Zastupnička inicijativa:

„Upućujem inicijativu sa ciljem zaštite sigurnosti djece sa poteškoćama u razvoju kao i sprečavanja ugrožavanja nastavnog procesa usljed kontinuiranih prijetnji školama i dojava o postavljenim bombama u osnovnim i srednjim školama u Kantonu Sarajevo. Očekujem da se djeci sa poteškoćama u razvoju posveti posebna pažnja i podrška obzirom na njihovu senzitivnost, izloženost dodatnim pritiscima i činjenicu da veoma stresno doživljavaju evakuacije.

Vlada Kantona Sarajevo u ovakvim okolnostima treba razmatrati uspostavljanje sistema kriznog upravljanja obzirom da je ugrožena sigurnost djeteta. Učenici i nastavno osoblje moraju biti adekvatno zaštićeni“

Odgovor:

Koristimo priliku informisati Vas da je na prijedlog Ministarstva za odgoj i obrazovanje Kantona Sarajevo (u daljem tekstu: Ministarstvo) Vlada Kantona Sarajevo je 24. 08. 2023. godine donijela Zaključak broj: 02-04-37009-31/23 kojim se prihvata Informacija Ministarstva o poduzetim mjerama i radnjama usmjerenim na unapređenje procedura zaštite i sigurnosti učenika putem resornih ministarstava, sa posebnim osvrtom na multisektorsko postupanje u kriznim, iznenadnim događajima u odgojno-obrazovnim ustanovama. Također, Vlada Kantona Sarajevo je na prijedlog Ministarstva usvojila Smjernice/scheme komunikacije multisektorskog postupanja u iznenadnim, kriznim događajima u odgojno-obrazovnim ustanovama u Kantonu Sarajevo. Scheme komunikacije su važne za efikasno postupanje u iznenadnim, kriznim događajima, iste osiguravaju brz i jasan protok komunikacije svih relevantnih strana. Naime, član 23. Pravilnika o provođenju mjera odgojno-obrazovne podrške i stručnog tretmana učenika („Službene novine Kantona Sarajevo“ broj: 33/24) propisuje obavezu postupanja škola u skladu sa Smjernicama komunikacije multisektorskog postupanja u iznenadnim, kriznim događajima u odgojno-obrazovnim ustanovama u Kantonu Sarajevo, te se u stavu (4) navedenog člana propisuje da su način formiranja Tima za upravljanje kriznim događajem i izrada plana evakuacije definisani Smjernicama i **Uputstvom za izradu plana**

evakuacije u odgojno-obrazovnim ustanovama koje donosi Ministarstvo. Uputstvo za izradu plana evakuacije odgojno-obrazovne ustanove je dostavljeno direktorima svih odgojno-obrazovnih ustanova, te isto sadrži sve faze postupanja u slučaju različitih kriznih događaja u odgojno-obrazovnim ustanovama.

Nadalje, pomenuta problematika je sigurnosni rizik koji se prepoznaje u školi, prema nama dostupnim informacijama dojava o postavljenoj bombi u školi su činili malodobni učenici naših škola. Također, razumijemo i dijelimo Vašu zabrinutost kao i zabrinutost cjelokupne društvene i školskih zajednica u vezi navedene problematike. Nadalje, koristimo priliku informisati Vas, da je Ministarstvo školama dostavilo zaključke sa sastanaka, održanih 15. 10. 2024. godine sa Vijećem roditelja učenika osnovnih i srednjih škola Kantona Sarajevo i 16. 10. 2024. godine sa Vladom Kantona Sarajevo, u vezi navedene problematike (preporuke za škole).

Ministarstvo je 31. 10. 2024., 07. 11. 2024. i 21. 11. 2024. godine ponovo održalo sastanke sa predstavnicima Vijeća roditelja učenika osnovnih i srednjih škola Kantona Sarajevo, te su doneseni sljedeći zaključci: izvršiti presjek četverogodišnjeg istraživanja o psihofizičkom zdravlju djece/mladih, prosvjetnih radnika i roditelja, jačati preventivne mjere kroz multisektorski pristup trenutnoj problematici, unaprijediti program usavršavanja roditeljskih kompetencija (programi specifični za roditelje u odnosu na dob djece i mladih, jačanje odgovornost roditelja), pratiti i izvršiti analizu trenutne situacije i kako je ista uticala na odgojno-obrazovni proces (ocjenjivanje, dobrobit djece, zaštita učenika, rad sa učenicima u riziku, djecom sa teškoćama i drugo), angažovati centar za socijalni rad, Porodično savjetovalište i druge ustanove i službe čija je podrška potrebna, nastavni proces provoditi isključivo u realnom okruženju i izbjegavati održavanje nastave na daljinu, putem Vijeća roditelja učenika osnovnih i srednjih škola Kantona Sarajevo redovno vršiti prijenos informacija, formirati javne kampanje s ciljem podizanja svijesti o značaju poboljšanja komunikacije roditelja sa djecom i izgradnje međusobnog povjerenja, provoditi ankete s ciljem utvrđivanja da li su škole provodile zaključke sa prvog sastanka održanog 15. 10. 2024. godine, naglasiti značaj smjernica i protokola o postupanju u kriznim događajima, vršiti pojačan nadzor nad radom i zakonitošću rada u školama.

Ministarstvo će nastaviti pratiti situaciju u školama, te redovno održavati sastanke sa nadležnim institucijama i Vijećem roditelja učenika osnovnih i srednjih škola Kantona Sarajevo. Ministarstvo će nakon okončanja kompletne istrage, detaljnije komunicirati sa školskim zajednicama i javnošću. Također, Vlada Kantona Sarajevo je imenovala radnu grupu koja ima zadatak do kraja januara 2025. godine donijeti protokol kako bi se unaprijedile procedure multisektorske saradnje između Uprave policije, Tužilaštva i škola.

S poštovanjem,



Dostaviti:

1. Naslovu
2. A/a